

48

36

HARVARD COLLEGE LIBRARY
FROM THE
HARVARD-YENCHING
INSTITUTE
SEP 30 1929

'78.

Ch L 5570.2928

5237.7.2928

明詩綜卷九十五下

屬國

小長蘆

朱彝尊



龍眠

方世舉

緝評

朝鮮下

林悌一首

靜志居詩話自悌至李仁老詩見朝鮮采風錄其官爵世次未詳姑系於此

中和塗中

羸驂馱倦客日暮發黃州可惜踏青節未登浮碧樓佳人金縷曲江水木蘭舟寂寂生陽館孤燈夜似秋

白光勳一首

縣津夜泊

旅泊依津口重遊屬暮年鐘聲隔岸寺人語渡湖船月上蒹葭遠燈橫島嶼連夜深風更急落鴈不成眠

崔壽城 一首

驪江

日暮滄江上天寒水自波孤舟宜早泊風浪夜應多

趙希逸 一首

謫中

歸心日夜關以東歸計即今還墮空一年春動萬里外孤山月出千林中愁來但覺此身遠醉後不知吾道窮瓊州雷州何許地古人今人同不同

沐億齡 一首

張漢瞻云
意致磊落

送友還山

塵土無憂染素衣蕭條石徑接柴扉飄然又作抽簪計夢逐白鷗江上飛

奇邁 一首

直禁詠懷

南山松柏幽北山煙霧深遊子暮何之庭樹生秋陰歸雲度遙峰宿鳥橫前林幽懷杳不極清風吹我襟

孫愷似
云韋柳

遺韻

金塗 一首

寄友

楊花落盡草萋萋楚客傷離思轉悽佳節一年寒食過

亂山千疊子規啼
虞翻去國身全老
王粲登樓賦幾題
相約天涯回白首
昭陽江上夕陽低

申欽 一首

寄友

廣陵三月已飛花
漢水孤帆落日斜
新結茅茨分洞府
欲隨麋鹿作生涯
平波細雨催耕犢
曲水游魚上釣叉
舉世盡從忙裏過
似君行樂獨堪誇

權鞮 一首

清明

淑氣催花信
輕黃著柳絲
人煙寒食後
鳥語晚晴時
老去還多事
春來嬾賦詩
京華十年夢
惆悵只心知

趙昱 一首

贈鑑湖主人

十年長掩故山扉
塵土東華幾染衣
想得鑑湖春夜月
子規應喚不如歸

李孝則 一首

烏嶺

秋風黃葉落紛紛
主屹山高半沒雲
二十四橋嗚咽水
一年三度客中聞

柳永吉 一首

福泉寺

落葉鳴廊夜雨懸
佛燈明滅客無眠
仙山一到傷春暮

烏帽欺人二十年

魚無迹 一首

逢雪

馬上逢飛雪孤城欲閉時
漸能消酒力渾欲凍吟髭
落日無留景栖禽不定枝
灞橋驢背興吾與故人期

李 嶸 一首

題僧軸

流雲山口草萋萋夜逐香煙到水西
醉後高歌荅明月
江花落盡子規啼

金宗直 一首

佛國寺

爲訪招提境松間紫翠重青山半邊
雨落日上方鐘語
與居僧軟杯隨古意濃頽然一榻上
相對鬢髮鬆

李承召 一首

詠燕

畫閣深深簾額底雙飛雙語復雙棲
綠楊門巷春風晚
青草池塘細雨迷
趁蝶有時穿竹塢壘巢終日啄芹泥
託身得所誰相侮養子年年羽翼齊

鄭 碣 一首

聞笛

迢迢沙上人初疑雙白鷺忽聞橫笛音
寥亮江天暮

朴文昌 一首

題郭山雲興館畫屏

萬頃滄波欲暮天
將魚換酒柳橋邊
客來問我興亡事
笑指蘆花月一船

李達一首

病中對雨

花時人病閉門深
強折花枝對酒吟
怊悵流光夢中過
賞春無復少年心

李植一首

泊漢江

春風急水下輕艫
朝發驪陽暮漢江
篙子熟眠雙櫓靜
青山無數過船牕

朴瀾一首

平壤大同館題壁

高句驪起漢鴻嘉
宮殿遺墟草樹遮
惆悵乙支文德死
國亡非為後庭花

詩話書序賄肅慎之命孔安國傳云海東諸尼駒驪扶餘駘之屬武王克商皆通道焉按駒驪主朱蒙漢元帝建昭二年始建國號

姜克誠一首

湖堂早起

江日晚未生蒼茫
十里霧但聞柔櫓聲
不見舟行處

鄭之升一首

留別

細草閒花水上亭
綠楊如畫掩春城
無久為唱陽關曲

惟有青山送我行

姜渾一首

贈妓

雲鬢梳罷倚高樓鐵笛橫吹玉指柔
萬里關山一輪月
數行清淚落伊州

金淨一首

旅懷

江南殘夢晝厭厭愁逐年華日日添
鶯燕不來春又去
落花微雨下重簾

鄭知常一首

醉後

桃花紅雨鳥喃喃繞屋青山間翠嵐
一頂烏紗慵不整
醉眠花塢夢江南

李仁老一首

題杏花鸚鵡圖

欲雨未雨春陰垂杏花一枝復兩枝
問誰領得春消息
惟有鸚之與鴝之

李子敏一首

子敏未詳何官

姚園客云萬曆庚戌仲秋值朝鮮貢使遇人贈高麗紙扇上題有詩稱辛丑秋東岳李子敏作

賀聖節詩

九達初日五雲覃虎拜彤庭百辟參
黼黻星辰璇極北
梯航玉帛越裳南
河清適際千年一
嵩壽齊呼萬歲三

遐壤小臣陪舞獸內尊偏倚主恩酣

朝鮮主試官 一首

嘉靖七年朝鮮人遇風飄至南通州被拘于守
禦所訊之乃其國主試官有詩

詩

白浪滔滔上接空布帆十幅不禁風此身若葬江魚腹
萬里孤臣一夢中

孫谷集詩 五首

不詳其名

孫谷詩集六卷不載姓氏觀其憶昔行贈申
正郎潔云嗟嗟天子聖命將出東征首事箕王都破竹
游刃迎漢京賊先遁大駕隨公卿草創朝儀在庶見王都清一旅復夏
業簡策傳諸經無忘在苦心日日望聖明知其為萬曆間陪臣當神廟
興復屬國之後而作詩以誦也天啓中毛總兵
文龍守皮島屬訪求東國圖籍以此集見寄

渡清川江

安州城外水如天立馬沙頭喚渡船帆帶晚烟依草岸
鴈迭殘日下蘆田長塗旅客思歸計向老筋骸憶少年
始信在家貧亦好近來雙鬢轉蕭然

題清道李家壁

南來數月計多違節序如流已授衣旅舍不堪黃葉落
暮天遙望白雲飛沙梁鴈下寒江渚門巷烟深苦竹扉
唯有同來野僧在病吟相對話西歸

客懷

此身那復計西東到處悠悠逐轉蓬同舍故人流落後
異鄉新歲亂離中歸鴻影度千峰雪殘角聲飛五夜風

惆悵水雲關外路漸看芳草思無窮

贈樂師許憶鳳

雙眉覆眼鬢蕭蕭曾捻梨園紫玉簫移向瑤臺彈一曲
曲終垂淚說先朝

悼亡

妝奩蟲網鏡生塵門掩桃花寂寞春依舊小樓明月在
不知誰是卷簾人

梅月堂詩一首

和鍾靈山居詩

蛺蝶雙雙舞藥畦薔薇架架采登梯一叢枸杞花初徧
五極人蓂葉已齊翠竹林中香麝睡紫荊枝上畫眉啼

千峰昨夜疎疎雨不分南池漲入溪

洛師浪客一首

安定館北驛

四月關門路風沙氣慘悽河邊春鴈盡林外曉鶯啼去
國魂長往思家意轉迷羸驂經左道今日向安西

無名氏一首

沈駙馬碧波亭

貴主華亭入翠微碧牕朱拱有光輝春來波暖魚龍出
夜久星疎烏鵲飛海上乘查時貫月江邊積石舊支機
當筵勸酒先投轄不醉應知客不歸

月山大君婷一首

詩話娉婷詩一首見吳子魚朝鮮詩選

應是朝鮮女子按說文

廣韻均不載有娉字惟玉篇有之注徒寧切和色也樂府詩集漢辛延年羽林郎篇不意金吾子娉婷過我廬娉婷字並用始此江南弄和云陽春路娉婷出綺羅喬知之詩明珠十斛買娉婷杜甫詩不嫁惜娉婷劉長卿不知娉婷色回照今何似韓愈詩砧影伴娉婷白居易詩明妃風貌最娉婷李商隱詩娉婷小苑中羅虬詩大都相似更娉婷則唐人固相沿用之載考丁度集韻疑或作娉可補廣韻之闕采風集收娉詩娉上冠以月山大君字當是東國尊稱殆非民間女子也

古寺尋花

春深古寺燕飛飛深院重門客到稀我正尋花花盡落
尋花翻為惜花歸

成氏 一首

竹枝辭

灤東灤西春水長郎舟已去向瞿塘巴江峽裏啼猿苦
不到三聲已斷腸

俞汝舟妻 一首

別贈

恨別逾三歲衣裘獨禦冬秋風吹短鬢寒鏡入衰容旅
夢風塵際離愁關塞重徘徊思遠近流歎滿房櫳

趙媛妾李氏 二首

詩話媛官學士承旨死倭亂妾李自號玉峰主人詩如兩兩鷓鴣失舊磯銜魚飛入菰浦去亦佳句也

采蓮曲

南湖采蓮女日日南湖歸盪槳嬌無力水濺越羅衣無
心却回櫂貪看鴛鴦飛

自適

虛檐殘溜雨纖纖枕簟輕寒曉漸添花落後庭春睡美

呢喃燕子要開簾

許景樊 五首

景樊字蘭雪筠筠之妹適進士金成立後成立

殉國難遂為女道士有集

景樊八歲作廣寒殿玉樓上梁文才出筠筠二兄之

右金陵朱狀元之蕃使東國得其集以歸遂盛傳於中夏 陳卧子云許氏學李氏而合作有盛唐之風外藩女子能爾可見本朝文教之遠詩話明閨秀詩類多偽作轉相附會久假不歸如今日相逢白司馬樽前重與訴琵琶吳中范昌朝題老伎卷也詩載皇明珠玉而謬云鐵氏二女寒氣逼人眠不得鍾聲催月下迴廊三泉王佐宮詞也詩載石倉詩選而假稱宮人媚蘭泉流不歸山羅文毅作而謂甄節婦詩誰言妾有夫高侍郎作而謂章恭毅母他若忽聞天外玉簫聲寧獻王權之詠權妃即指為權貴妃作風吹金鎖夜聲多羅翰林環之詠秋怨遂誣為王莊妃詞甚至析情字為小青巾青冢者過孤山而流連託聯句於薛濤刻濤集者綴卷尾而剗剛助談小說貽笑通人吾於許景樊之詩見其篇章句法宛然嘉靖七子之體裁未應風教之訖符合如是不能無贗鼎之疑也

望仙謠

王喬招我游期我崑崙墟朝登玄圃峰遙望紫雲車雲
車何煌煌玄圃路茫茫倏忽凌天漢翻飛向扶桑扶桑
幾千里風波路阻長吾欲舍此去佳期安可忘君心知
何許賤妾徒悲傷

次伯兄高原望高臺韻

層臺一柱壓嵯峨西北浮雲入塞多鐵峽霸圖龍已去
穆陵秋色鴈初過山迴大陸吞三郡水割平原納九河
萬里登臨愁日暮醉憑青嶂獨悲歌

次仲兄筠高原望高臺韻

崔嵬雲棧接青霄峰勢侵天作漢標山脈北臨三水絕
地形西壓兩河遙烟塵暮卷孤城出首宿秋深萬馬驕

東望塞垣鼙鼓急幾時重起霍嫖姚

效崔國輔

妾有黃金釵嫁時為首飾今日贈君行千里長相憶

雜詩

精金明月珠贈君為雜佩不惜棄道旁莫結新人帶

安南

詩話安南曾為郡縣漸文治者深而其國人詩選家多置不錄予從李文鳳越嶠集擇其詞旨馴雅者著於篇

國王黎灝一首

灝一名思誠天順四年國人所立卒私謚淳皇

帝僭號聖宗

送錢學士溥歸朝

五嶺天高瘴霧開詔書飛下越王臺萬年重紀黃龍瑞
九譯爭看白雉來曉日珠崖標柱在秋風銀漢使查回
吾君若問交南事久已傾心仰上台

黎景徽一首

景徽文職大頭目僭左僕射

奉贈錢學士

紫殿承恩入夢頻歸鞭裊裊向天津
赭袍色映千山曉
玉節光回萬井春五嶺風輕金勒緩
三湘月白錦帆新
夜闌宣室如前席為道交南共帝臣

阮直一首

直爵里未詳

送錢學士還朝

曉日初開瘴霧空歸程馬首正秋風知音豈限珠厓北
惜別那禁珥水東上國有人還獻納遐方無事賴幪
他年兩地如相憶萬里懸情寄塞鴻

黃清一首

清僭吏曹侍郎

送錢學士還朝

公望端堪邁俊豪遠持使節效賢勞九霄日月瞻依近
萬里江山興詠高別酒頻斟情戀戀歸心莫遏水滔滔
自從回首天南後幾度懷人正鬱陶

黎念一首

念大頭目

送湛內翰還朝

綸音讀罷紫泥封回首蓬萊第一峰望外交關千里月
夢中帝闕五更鐘星查迢遞歸程遠雲樹參差別思濃
南浦吟成憑寄語滔滔江漢共朝宗

阮澤民一首

澤民爵里未詳

送湛內翰還朝

日送星輶萬里旋那堪惜別思淒然交關此日分岐後
南北春風共一天

安南使臣一首

題南康縣南野

鼓報黃昏各泊船
咿咿軋軋櫓聲連
一雙鳧鴈滄浪外
幾箇人家楊柳邊
紅日落殘鈎挂月
白雲卷盡鏡磨天
安南萬里朝天客
暫借郵亭一夕眠

占城

貢使 二首

進貢初發占城

行盡河橋柳色邊
片帆高挂遠朝天
未行先識歸心早
應是燕山有杜鵑

江樓留別

青嶂俯樓樓俯渡
遠人送客此經過
西風揚子江邊柳

落葉不如離思多

詩話近峰聞略載占城使臣寓蘇州之天王堂問葵花何名人給之曰
一大花也即題詩曰花於木槿渾相似葉比芙蓉只一般五尺闌干遮
不住獨留一半與人看抄此乃寶
應陶成題李西涯館中葵花之作

日本

噶哩嘛哈

或作答黑
麻一首

詩話高帝惡倭不恭示以欲征之意日本進表辭頗不遜命噶哩嘛哈
上表帝問其風俗答五言詩既而絕其貢考日本疆域時拓地八道六
十六州六百一十三郡八十二浦宜其不知漢大而云國比中原國也
若其人多壽就國王論如神武天皇一百二十七歲孝昭天皇一百十
八歲孝安天皇一百三十七歲孝靈天皇一百十五歲孝元天皇一百
十七歲開化天皇一百十五歲崇神天皇一百二十歲垂仁天皇一百
四十歲景行天皇一百有六歲成務天皇一百有七歲神功天皇百歲
應神天皇仁德天皇俱百有十歲雄略天皇百有四歲降年之永中土
所希所云人同上古人言雖大而非夸矣惟是國俗無冠國王但著烏
帽直而頂圓銳高半尺以綃為之男女笠用蒲或竹或椶木謂為唐制
度夫豈其然至若天皇之子娶於其族夫死妻立兄死
妹立子死母立何禮之有明祖絕其貢使不亦宜乎

荅大明皇帝問日本風俗

國比中原國人同上古人衣冠唐制度禮樂漢君臣銀
甕芻清酒金刀鱠紫鱗年年二三月桃李自陽春

普福 一首

宣德七年倭船入貢凡九艘其使普福迷失於
樂縣沙嵩藤嶺獲解

被獲歎懷

來游上國看中原細嚼青松咽冷泉慈母在堂年八十
孤兒為客路三千心依北闕浮雲外身在西山返照邊
處處朱門花柳巷不知歸日是何年

中心叟 一首

叟日本使臣

弔郭璞墓

遺音寂寂鎖龍門此日青囊竟不聞水底有天行日月
墓前無地拜兒孫秋風野寺施香飯夜月漁燈照斷魂
我有誄歌招不返停船空見白鷗羣

詩話葬師言禍福多本於景純之經然試與百人分謀之無一人同者
所云龍穴砂水向背如杓鑿齟齬之不相入其說業已難擇加以日者
配以年神方煞吉神祇百二十凶神倍之規避實難以是不克葬者多
矣世傳景純墓在金山足過於詭奇沈啓南詩氣散風衝豈可居先生
埋骨理何如日中數莫逃兵解世上人猶信葬書如叩晨鐘寐者可以
發深省矣中心叟墓前無地拜兒孫一語亦足發笑詩載廬陵胡經用
甫金山志志成於正德
辛巳文待詔徵仲序之

無名氏 一首

春雪

昨夜東風換北風釀成春雪滿長空梨花樹上白添白
杏子枝頭紅不紅鶯問幾時能出谷燕愁何日得泥融
寒冰鎖却秋千架路阻行人去不通

釋天祥 三首

寄南珍

上人居處僻心與石泉清道在從違俗身閒不用名空
階松子落雨徑蘚花生怪得稀相見年來懶到城

長安春日

何事長安客春來思易迷樂游原上草無日不萋萋

榆城聽角

十年游子在天涯一夜秋風又憶家恨殺葉榆城上角

曉來吹入小梅花

釋機先 二首

送別

天書召賈生匹馬出滇城白首相逢處青雲送別情山
經巫峽盡水到楚江平好獻治安策殷勤荅聖明

挽遜光古先生

昨日來過我今朝去哭君那堪談笑際便作死生分曠
達陶徵士蕭條鄭廣文猶憐埋骨處西北有孤雲

明詩綜卷九十五下

明詩綜卷九十六

无名子

小長蘆 朱彞尊 錄

雅山 張友直 緝評

潯州士女

相思曲 二首

妹相思不作風流待幾時只見風吹花落地不見風吹

花上枝 王貽上云雖侏儒之音與樂府子夜讀曲相近

妹相思蜘蛛結網恨無絲花不年年長在樹孃不年年

伴女兒

靜志居詩話此曲載吳洪粵風續九是潯州士女所歌而廣東新語亦有之

廣東歌堂詞

道別

三首

采蓮去時江水深采蓮歸時江樹陰中間日出四邊雨
記得有情人有心

歲晚天寒郎不回厨中烟冷雪成堆竹篙燒火成長炭
炭到天明半作灰

老龍山下有狂風老龍山上月朦朧檳榔勸郎郎不醉

姑負奴脣一點紅

粵俗好歌語多雙關詞不必雅然情必極至
先嫁一夕戚懿與席者名坐歌堂歌詞有云一樹石榴

全著雨誰憐粒粒淚珠紅又云燈心點著兩
頭火為孃操盡幾多心天機所觸自然合韻

翰林館課

原心亭詩

鬱鬱松樹枝肅肅冬日陰孤亭弘且敞乃在鳳池潯鳳

池超人寰萬籟無一音暫息塵中轍因鮮俗慮侵端坐
邈宇宙掩帙忘古今頓令羣動祛見此方寸心金門足
大隱豈必謝纓簪

白頭閒話

感述

詩話是篇不知誰氏所作或
有感於焦黃中張懋修輩乎

御史大夫湯御史大夫周兩人皆酷吏寸心操戈矛蔽
賢者無後其語蓋有由如何安世禹顯爵封通侯有子
駢且角乃產自犁牛思之復思之天道亦有私

單縣老父

漢河懷古

漢河在單縣源出汴水下流通
沛以漢高還沛曾涉此故名

王氣豐沛間濬源自單父風雲昔飛揚萬乘歷茲土富
貴歸故鄉意本重瞳羽誰知錦衣行在漢不在楚

粉墨春秋

非仲藏宋温日觀蒲萄

錢塘江潮三日斷翠華遥遥六宮散茫茫黑霧覆厓山
二龍無聲泣天畔衣冠南渡靖康年忍見旄頭明夜半
冬青雪冷子規啼尚有遺民温日觀閱閱姓名知是誰
有身但向浮屠竄酒酣獨抱支離叟罵賊猶存目光爛
依稀八法素師傳蒲萄餘技留篇翰馬乳曾無塞上塵
鰕鬚尚似江南岸涼雲不共荔支殘景風難竝櫻桃薦
莫道驪珠顆顆圓萇弘碧血光零亂三百餘年歎息同

何人對此非河漢借問苦心愛者誰我友張君獨悲歎
神物一去何繇還觸目皆非氣凋換吁嗟張君且勿歎
墨花會見虹蜺燦涼州美酒共天家大叫忠魂歌復旦

瀟湘集

洞庭秋月

纖雲不動金波浮冷光萬里開清秋青山一髮渺無際
大影落鏡星河流中流無人萬籟寂夜深往往魚龍出
何人長笛在扁舟水遠天長露華白

渭臺漁父

喜艾純卿至

何日離青海春過北斗城亟須譚間闊深足慰交情雨

雪辭關塞風塵送客程投荒君最苦早有二毛生

潼川碑

題石鏡寺

州志成化三年蜀僧繼圓於草莽中得碑刻此詩

昔日朱輪守經過釋子家柱間留墨蹟泉下隔年華雲去空雕檻風來卷白沙江山誰似画每到動吁嗟

天目游人

宿重雲菴

烟蘿一徑通宴坐白雲中樹影晴浮水秋聲半在空疎鐘山際月高枕竹邊風竟夕渾無寐清談對遠公

藕花社僧

嘉興白蓮寺僧有藕花社詩集不知其名

山居

滄海歸來日貪看麋鹿羣牕虛含遠嶂屋破補重雲夕鳥吟邊過春蔬雨後分不須憐閒寂清梵隔山聞

玉華山樵

不知何許人洪武初寓東陽之東山披麻戴笠散步閒吟于山水間終不肯言姓名或云陳友諒客友諒亡遁跡至此遺詩百篇孫石臺揚序之名玉華遺橐

和韻荅玉山呂誠中

窮塗往往白頭新誰謂綈袍念故人此日不須辭舊雨空山聊自度殘春艱難作客仍多病生死無家任此身

二十年來相憶處幾回月夕與風晨

野亭老父

桐城劉燾成化間與友人同赴省應選貢塗中
風雨驟至因解裝暫憩野亭共賦送春詩忽一
老父衣蓑荷笠至聞吟詩亦請筆硯頃刻詩成
云云

怨風怨雨總皆非風雨不來春亦歸蜀魄啼殘花影瘦
吳蠶喫盡柘陰稀枝頭綠軟梅初熟口角黃乾燕學飛
我亦欲歸歸未得擔頭猶挂舊蓑衣

萊山樵者

濬縣眺望

河流遠徙大伾存極目中原野色昏禾黍油油迷故國
羝羊逐逐過前邨黃花冷笑三秋客紅葉初飛十畝園
賴有淹留同調在茫茫禹跡試重論

明詩鼓吹

題金陵沙士清樂清軒

竹裏行厨竹外門宛然風景似山邨石闌柳暗藏新雨
詩壁苔荒沒舊痕林下鳥鳴花自落溪頭鹿過水偏渾
晚來半掩東軒卧一枕梨雲鎖夢魂

戴斗夜談

書玉田行館

老去年華暗自驚殊方節序倍關情蕭條旅館孤燈宿

迢遞歸塗白髮生海甸星河分歲色山樓鼓角動春聲
柳盤柏徑誰相識悵望鄉原北斗橫

丹川

李時遠云丹川不知何許人曾官給
舍轉御史集不書撰人無前後序

棧道早行效白香山體

連雲石磴曉蒼蒼天險分明百二強萬里西南通鳥道
雙旌上下轉羊腸一溝流水一溝竹幾樹垂楊幾樹桑
登覽不知行役倦半生詩債却猶償

雲谷樵夫

書大道寺壁

西華雲臺去路長投閒翻為看山忙十年有夢尋中岳
四月披雲過太行清世誰能便吏隱幽栖吾獨愛僧房
昨來不寐焚香坐讀盡楞嚴夜未央

黃州志

赤壁寫懷

武昌東下次江皋赤壁磯頭艤画橈廢壘烟消荒草合
橫江鶴去碧天遙岸邊漁父疑殘炬水底龍吟憶洞簫
往事千年增感慨荻花楓葉晚蕭蕭

昌平州志

仙人洞

石洞窅且深花落無人埽仙翁去不還何處尋瑤草

虎谷

虎谷名金山客行初未識日午山下過人面一作黃金色

明詩總卷九十六
六
銀山

銀山本在北萬丈青雲梯曉見居庸雪銀山忽在西
龍泉

瀾瀾山下泉滌洄白如玉清以濯吾纓濁以濯吾足
安濟橋

石梁跨飛虹水清魚可數莫謂非通津亦有江南估
長安可游記

題西山清涼寺壁

山僧汲空潭驚起二龍子百里雲冥濛三日雨不止
青鞵踏雪志

題西山水盡頭

雙流泱泱鳴石根失其一棄糠於此中應從玉泉出

南靖老人

題壁

青青千里草隱隱獨家邨日暮客投宿山深虎守門

吳下人

詩

僕夫不識路踟躕道傍久寒風吹衣襟落日照馬首

屠生

一首

蕭山諸生屠姓失其名居近西子祠題詩於壁
是年學使者夢一婦人謂曰吾西施也生未入
五湖而蕭山屠生輒妄言其為吾斥之既按部

詢生生大驚誦其詩歎曰詩固佳然已失實乃
令生詣祠謝已爲文以祀之

題西子祠壁

紅粉溪邊石年年漾落花五湖烟水闊何處浣春紗
南潯祇園寺詩

贈老僧

清溪通笠澤地以水爲鄉竹青三日雨僧白一頭霜
張叟

叟嘉興人不知名

秋思

江上芙蓉開江上芙蓉謝開謝總秋風江流無日夜

盱眙女郎

題壁

短袖籠春去低鬟明月中逢人惟有淚不敢說遼東

正德中朝士

上長沙相公

才名直一作少與斗山齊伴食一作中書日又西回首湘江

春草綠鷓鴣啼罷子規啼

石淙集附錄

題邠州郵亭壁

太宰西征秉將權三秦豪傑滿軍前中筵笑指金貂客
盡是當年舊執鞭

永壽監軍莊郵亭題壁

金符玉節催征騎赤日炎天渡大江塞上風清連瀚海
六羸驚見舊旌旄

荆先生

不知何許人客濟寧人有持白團扇撲蠅為血
所漬因繪為紅葉題詩云云人遂目之為荆紅
葉

題紅葉

新霜楓葉醉殷紅記得題詩出後宮繞遍御溝尋不見
被風吹入月輪中

黃州志

武磯山

寂寞武磯山上樹蕭條邏阜水中天垂楊不管人間事
猶自青青兩岸邊

廣西舊志

題義寧華嚴洞

跨鶴歸來不計年洞中流水綠依然紫簫吹徹無人見
萬里西風月滿天

殊勝寺道人

嘉靖初平望鎮殊勝寺有一道人來游題其壁
云云後倭人至鎮寺首焚毀

題壁

我自蓬萊跨鶴回山僧不遇意徘徊時人莫解菩提寺
三十年餘化作灰

福教寺僧

嘉靖初魏國公侵武進縣福教寺田僧乃棄去
後過寺題詩云云

殘山剩水一荒基古寺烟籠白塢低燕子不知身是客
秋風還戀舊巢泥

黃圖雜誌

直沽權歌 三首

天妃廟對直沽開津鼓連船柳下催釀酒未終舟子報
舵樓黃蝶早飛來

雲帆十幅下津門日落潮平不見痕葦淀茫茫何路泊
一燈明處有漁邨

蘼蕪楊柳綠依依檣燕檣鳥立又飛賺得南人歸思緩
白魚紫蟹四時肥

灤縣志

白河漁舟

溶溶漾漾白河流點點輕鷗上水浮遙望孤燈明滅處
葦花斷岸一漁舟

浦城志

南浦

南浦春流漲綠波溶溶漾漾浴鷗多銷魂尚記江淹賦

碧草青苔送別何

資江石刻

書石溪亭

桃花依舊放山青
曲几焚香對画屏
記得當年春雨後
燕泥時污石溪亭

洞庭老人

卓彥恭月夜泊洞庭有老人盪小舟過之歌詩
云云見小草齋詩話

歌

八十滄浪一老翁
蘆花江上水連空
世間多少乘除事
良夜月明收釣筒

玉堂逐客

題西禪寺詩

隔江人唱浪淘沙
月上梧桐影未斜
客到潯陽談往事
青衫無淚濕琵琶

耳園公

君山

山色湖光日漸曛
誰將玉珮弔湘君
天風一夜連湖起
吹落蒼梧萬里雲

花鏡雋聲

踏燈詞

髻挽烏蠻試晚妝
衫裁白氎學霓裳
私邀女伴門前立

明詩歸卷九十五
不避燈光避月光

盤江逋客

題分水關

一道泉分兩道泉層層松栝翠參天鷓鴣聲裏山無數
合向誰家草閣眠

碧岡道人

堯渡

秋水初平露石磯堯城渡口柳依依無端隔岸漁歌起
白鳥一雙撲鹿飛

不出戶庭錄

題陳山壁

啓牕日日對青山山色青青不改顏我問青山何日老
青山問我幾時閒

陳墅里人

江陰陳墅里有郭姓者失其名題詩於壁

春日偶題

細細冥冥濕燕泥棟花香暖鶉鳩啼籬邊笋迸無多日
恰與茅簷一丈齊

電白老兵

一首

題城樓

畫角吹來歲月深譙樓無古亦無今不如歸我龍山去
萬竹青青何處尋

靈谷寺壁上詩

九日

風雨蕭蕭戶未開忽聞鄰叟負薪回自言今歲登高便
曾上鍾山絕頂來

鍾山野老 一首

風香閣

風香高閣倚層厓一老扶筇下蘚階獵火夜來驚鹿過
松根拾得舊銀牌

高百戶

百戶嘉興人遺其名

閩歸簡吳巨手

半牀書卷剩山河如此歸來可柰何便欲與君同一醉
梅花不比舊時多

湘中女子

繫左臂詩

生來誰惜未簪笄身沒狂瀾命不齊河伯有靈憐薄命

東流直繞洞庭西

王仰止云湘中女子名氏不傳第知為湘江人其沉江也逆流至湖南水濱顏色如生左臂纏素帕十絕句閩

人林古
度跋之

明詩綜卷九十六

明詩綜卷九十七

雜流

附 謙從

小長蘆 朱彝尊 錄

從子甫田 緝評

靜志居詩話明以賈客而稱詩者衆矣若歙州之鄭作程誥龍游之童珮皆賈也然鄭程皆受學于李空同童執經于歸太僕則不得以賈人目之故錄雜流自谷淮以下而謙從之能詩者附焉

谷 淮 三首

淮字文東秦中賈人客淮揚間傭書給事澄江

張學士家

顧玄言云谷郎能仿文徵仲書法兼善音律日以文翰為業其家詆為書癡其詩殊有雅致

寄遠

瓊花臺上雨初收黃歇山前水急流莫道別來鄉國遠
南江愁是北江愁

病中

一貧成病竟年年愁入蒼茫歲暮天客至擁衾聊起坐
冷風吹雨濕牕前

題画

十月山家落木稀高牕終日見雲飛柴關地僻無人到
獨向峰頭抱犢歸

李東白 一首

東白京山人為衣工

姚園客云東白黃鶴樓詩秋在仙人鐵
笛中一語可云絕唱李宗定恒誦之後

游秣陵歸舟至雲夢澤中萬臺寺自吟云好水好
山來路遠秋風秋雨到家遲拍手一笑墮水而死

登黃鶴樓

西望家山一改容白雲飛盡楚江空興饒老子胡牀上

秋在仙人鐵笛中鄂渚霜花沿岸白漢陽楓樹隔江紅
倚闌拍手招黃鶴千古登臨感慨同

盧 雲 一首

雲字宗潤鄞人義烏縣吏有月漁集

詩話月漁託身文無害尋即棄歸以醫自給有邀之治疾者見壁上詩
和之繞榻吟哦至旦主人以為怪不服其藥每得金置袖中為人探去
不知知亦不問也故人有知黟縣事者徒步萬山中訪之距縣百里而
病夜夢挽其髮盡變為黃絲寤而語人曰色絲為絕吾死矣夫果死于
客舍平居語沈嘉則曰古人旅葬裸葬無所不可何必故
鄉嘉則因買山於休寧東郭外葬焉題曰詩人盧九之墓

西亭同朱近臣送沈嘉則

送君江上行路近梅根渚雨急天欲昏不盡別時語

周 俊 五首

俊字伯英江陰賈客有南岑集

詩話伯英詩頗清越如海風吹雨散江月伴潮生亂鴉千樹曉新水一
篙秋市酒薄於水漁燈密似螢風前雙鬢逢秋短海上孤城過雨寒俱
出塵埃
之表

蕪城對酒寄懷張淡雲校書

樓上春雲黯夕陰折花載酒偕同心芙蓉繡幄隱紅燭
美人一笑輕千金南浦別離情脈脈柳花繚亂風無力
愁來獨上廣陵城江水微茫天一色

吳陵暑夕

斷虹收宿雨大火欲西流一片水浮月三更人倚樓兼
葭迷白露蟋蟀響清秋惆悵江南北年年事薄游

鵝鼻磯

細雨晚山晴殘霞映江樹不見垂綸人寒潮自來去

春日雜詠

春來嬾慢起常遲六尺枯藤強自支忽見柳花飛作雪
小橋回首立多時

贈張淡雲

星河淡淡夜迢迢深院涼生動絳綃傳得揚州新樂府
倩誰人竝坐吹簫

黃微一首

徽字季美杭州人為閩賈沈翁贅壻繼其業有
穀音

詩話季美詩何侍郎穉孝稱之為作詩賈傳其略曰唐人以詩名桑門
閨秀皆進乎技賈人缺焉季美詩不妨賈賈不揜詩遂無前人其賞譽
是若

竹崎

水口薛亭官長在搜鹽日午喚停船平明舍權山城外
竹轎迎人又索錢

李 恬 一首

恬扶溝人

早年供青衣之役年三十始
攻苦讀書詩成一家言士夫禮重之

江行有懷

醉起意不盡江邊尋杜蘅折來何所寄游子在西京惜
別三春晚窮年百慮生日斜空悵望一水隔盈盈

馬來如 一首

來如內鄉人翰林李裴之僕

江上懷吳人朱侍山久羈均陽

江草江花一水長憐君何事滯均陽逢人為報鄉園侶
吳客而今作楚狂

李 英 三首

英字少芝以青衣給事南海歐大任

俞汝成云計有
功唐詩紀事二

百餘年詩人千一百五十家而卷末有僕二人一為咸陽郭氏捧劍之
童一為池陽刺史戟門門子朱元余輯盛明百家詩僅得李英一人可
以為難矣 宋轅文云李生
詩清勁可誦能宗其主人

初去故園留別諸友

風烟一以別把酒戀同游人去江樓晚帆飛海國秋青
山馳遠夢黃菊動離愁曾是滄洲客能無念白鷗

秋思

曾是滄洲舊釣徒西風落魄寄江都望中故國千山阻

別後經年一字無庾嶺烟霞秋思遠楚天風雨暮帆孤
誰憐飄泊他鄉客不為尊鱸滯五湖

十月京師紀事

蕭關風急馬頻嘶四塞河山動鼓鼙獨立高臺望烽火
蘆笳多在薊門西

林汝元 二首

汝元閩王粹夫家青衣

詩話錫山俞汝成輯盛明百家詩錄青衣一人南海李英也虞山

集益以二人扶溝李恬內鄉馬來如余錄詩綜又益一人閩

林汝元也聞閩中青衣善詩者不止汝元尚有陳香初陳竹逸鄭蘭子
三人未詳其名澄江楓葉老斷岸菊花疎香初句也月明黃葉露花隱
赤闌橋蘭子句也古墓梨花鸚鵡雨荒原麥穗鷓鴣天竹逸句也附疏于此當博訪之

溪行

雪壓梅花破霜侵楓葉稀林間黃犢卧沙際白鷗飛水
急灘聲亂溪迴樹影微前峰新月吐樵子蹋歌歸

京口夜泊

隱隱漁歌隔岸聽娟娟新月照中泠江南風景今宵始
回首瓜洲一抹青

胡梅 二首

梅字白叔吳人給事徐通政申宅晚瞽以醫自
給白號清壑道人

詩話白叔幼而秀穎以狐旦登場四坐叫絕徐通政維嶽俾掌書史嘗
取通政友人赤牘畀之炎火為通政誦之不遺一字

如是也白叔賦催妝詩 擊節於是詩名藉甚晚輯
詩集目之曰山人子取以附雜流之末蓋不敢沒其實云

沈璧甫自城南移居虎丘和周安期韻

君住南城已數年今移虎阜寺門前紅疎未補薔薇架
綠滿初停茉莉船雨過峰頭流一壑月明隄上聽三絃
酒壚餅肆皆鄰近我欲頻來莫惜錢

曉飯小孤山下

兩岸黃蘆霜滿船推蓬曉爨鷺鷥前小孤山下風初定
江面剛生一寸烟

吳忠一首

忠華亭姚元龍宅青衣陳徵君繼儒賞其桃花
詩勸其辭主人送至小崑山爲焚香道者

詩話余既錄二李一馬之詩又益以胡白叔閱東吳舊話又得吳忠一人按徐文長逸藁有詩云南海大夫歐泉州處士尤泥中雙綠鬢詩伴兩蒼頭自注尤山人侍者范鹿能詩不減歐楨伯之僕惜其藁不得見也

桃花

游子訪桃源桃源在深處不用問漁郎谷口隨花去

明詩綜卷九十七

明詩綜卷九十八

妓女

小長蘆 朱彞尊 錄

越來 江王鳳 緝評

靜志居詩話明制南北都各立教坊司北有東西二院南有十四樓其後南都舊院特盛成弘間院中色藝優者結二三十姓為手帕姊妹每月節以春繁巧具餞核相關名為盒子會沈啓南曾為作圖係以長句然青樓之題詠無聞也隆萬以來冶游漸盛浙有沈水部某託名永華梅史以北京東西院妓郝筠等四十人配作葉子牌金沙曹編修大章立蓮臺新會以南曲妓王賽玉等一十四人比諸進士榜一時詞客各狎所知假手作詩詞曲子以長其聲價於是北里鮮有不作韻語者其偽真無由而辨識矣姑從諸家選本綴錄成卷

趙麗華 二首

麗華字如燕小字寶英南院妓自稱昭陽殿中

人

詩話如燕父銳以善歌樂府供奉康陵如燕年十三錄籍教坊能綴小詞被入絃索予嘗得其書画扇楷法絕佳後題云乙卯中秋同西池徵

君質山學士集海濱天香書屋書此竟聞任兵憲在陸涇壩禦倭大捷
奏凱回戈亦快事也沈嘉則為作傳有云趙雖平康美人使具鬚眉當
不在劇孟朱家下今即其題扇數語
豪宕可知賦別一詩亦手書便面者

荅人寄吳牋

感君寄吳牋牋上雙飛鵲但效鵲雙飛不效吳牋薄

席上賦別

妾舟西發君舟東頃刻天生兩處風此去雲山天際渺
寸心千里附冥鴻

朔朝霞 一首

朝霞金陵妓

送人

秋風江上送君舟落葉江楓總別愁解纜不知人去遠

凭闌猶倚夕陽樓

姜舜玉 一首

舜玉自號竹雪居士南京舊院妓

花源逢顧何二使君作

仙源凡幾曲夾岸桃花開忽漫逢劉阮殷勤勸酒杯

徐翩翩 一首

翩翩字飛卿一字驚鴻南院妓有集

詩話翩翩年十六時名未起學琴不能操縵學曲不能按板因舍而學
詩謝少連於眾中見之此陳王所云翩翩若驚鴻者也由是人咸以驚鴻
目之有妹亭亭字若鴻亦慧黠翩翩晚嫁江陰郁
生郁卒還秣陵為尼居蓮子營小菴以老

江陰送顧太

一日發江口五日下長洲可惜送君淚不隨江水流

趙彩姬 四首

彩姬字今燕南院妓冒伯慶云較書容與温文清言楚楚徐孀老去枇杷花下閉門居風流猶可想也

詩話今燕張幼于所押名冠北里時曲中有劉董羅葛段趙何蔣王楊馬褚七後齊名所稱一二釵也晚居琵琶巷口冶游少年號曰閉門趙四其詩頗勝諸人

暮春江上送別

一片潮聲下石頭江亭送客使人愁
可憐垂柳絲千尺不為春江縮去舟

憶故居

柳絮春泥玉壘封珠簾深鎖暮烟濃
分明記得雙棲處夢繞青樓十二重

送幼于還吳門

花前雙淚濕衣裾把酒江亭落照餘
此去吳門霜月滿逢人好寄洞庭書

寄陳八玉英時留姑蘇

何處簫聲獨上樓傷心桃葉水空流
一從南國春歸後無復佳人字莫愁

馬守真 一首

守真字湘蘭一字玄兒又字月嬌金陵妓有集

詩話湘蘭貌本中人而放誕風流善伺人意性復豪俠恒揮金以贈少年感吳人王伯穀解墨郎之厄欲委身焉伯穀不可萬曆甲辰秋伯穀年七十湘蘭買樓船載小鬟十五造飛絮園置酒為壽晨夕歌舞流連者累月亦勝引也伯穀序其詩大略云秣陵佳麗之地青樓狹邪之間桃葉題情柳絲牽恨胡天胡帝為雨為雲有美一人風流絕代問姓則千金燕市之駿託名則九畹湘江之英輕錢刀若土壤翠袖朱家重然

諾如丘山紅妝季布爾其擲琉璃之管字字風雲擘玉葉之牋言言月
露翻庭花之舊曲按子夜之新聲奚特錦江薛濤標書記之目金昌杜
韋惱刺史之腸而已
哉曲中傳為佳話

自君之出矣

自君之出矣不共舉瓊卮酒是消愁物能消幾箇時

姚園

客云誦之
令人酸楚

朱無瑕 一首

無瑕字泰玉金陵妓有繡佛齋集

秋閨曲

芙蓉露冷月微微小苑風清鴻鴈飛聞道玉門千萬里
秋來何處寄寒衣

孫瑤華 一首

瑤華字靈光金陵妓歸新安汪景純有遠山樓

豪

次韻汪仲嘉戲代蘇姬寄吳郎之作

由來歡愛說新知空結同心不自持山上蘼蕪寧再遇
西陵松柏詎相期羅襦明月君休繫紈扇秋風妾不辭
極目自憐春欲盡流鶯飛處草離離

崔重文 一首

重文字媚兒一字嫣然南院妓

別黃玄龍

楓落鴉翻秋水明長橋獨樹古今情尋常歌板銀罌地
從此傷離不忍行

鄭如英 一首

如英字無美桃葉妓

詩話無美以韶豔聞曲中呼為安十二
安其小名也詩筆流便但不暇持擇耳

雨中賦別

執手難分處前車問板橋愁隨風雨長魂為別離消客
路雲兼樹妝樓暮又朝心旌誰復定幽夢任搖搖

景翩翩 二首

翩翩字三昧 一作驚鴻 建昌妓嫁丁長發丁為人誣訟

于官景竟自經有散花吟

詩話王伯穀題散花吟云閩中有女最能詩寄我一部散花詞雖然未
見天女面快語堪當食荔支翩翩家本盱江時游建安故伯穀誤以為
閩中女子也時又有沙飄飄新都謝少連撰季漢書成其友釀金賀之
布席齊王孫第四方之士會者百人選六院麗人侑酒飄飄為冠評者

比之揚州蕃禧觀
瓊花未有兩樹云

襄陽蹋銅蹄

駿馬蹋銅蹄金羈豔隴西郎能重意氣妾豈向人啼

與蘇生話

十日平原飲三秋江上船一經搖落後明月幾回圓

薛素素 一首

素素小字潤孃嘉興妓有異才數嫁皆不終有

南游草

詩話薛五較書有十能詩書琴奕簫而馳馬走索射彈尤絕技也予見
其手寫水墨大士甚工董尚書未第日授書禾中見而愛之為作小楷
心經兼題以跋至山水蘭竹下筆迅掃無不意態入神聞在京師挾彈
走馬能以兩彈丸先後發使後彈擊前彈碎于空中又置一彈于地以
左手持弓向後以右手從背上反引其弓以擊地下之彈百不失一嘗
置彈于小婢額上彈去而婢不知江都陸無從歌云酒酣請為挾彈戲

結束單衫聊一試微纏紅袖袒半鞦側度雲鬢引雙臂侍兒拈丸著髮
端回身中之丸竝墜言遲更疾却應手欲發未停偏有致范夫人贈詩
云重開別院貯文君寶絡千金換翠裙非雨非雲香滿路前身應是薛
靈芸尋為李征蠻所嬖又嘗侍沈孝廉景倩中櫺其畫象傳入蠻峒西
陽彭宣慰深慕之費金錢無算致之不得也

春日過茅山

參差臺殿閔靈蹤句曲茅君次第逢洞口鶴窺曾過客
日中人上最高峰華陽澗水桃千樹舊館壇碑闕幾重
遙望金沙何處是浮圖千尺罩烏龍

張回一首

回字淵如一字觀若金陵妓

送別賦得帆

勞勞亭上別無計共君歸一葉隨風去孤帆挾浪飛目

窮河鳥盡望斷浦雲非後夜相思處傷心隔翠微

羽孺一首

孺字素蘭一字靜和嘗熟人生不識姓善音律
推律得羽聲遂以為氏後為人所殺有詩集

柳

草閣疎林迴簷前遶綠楊章臺憐御苑灞岸惜他鄉繫
馬青春晚藏烏子夜長玉關頻折贈離思斷人腸

周文一首

文字綺生嘉興妓

沈宛君云綺生初出平康終歸匪匹
鬱志而死遺藁甚多不傳良可惜也

詩話綺生善小詩沈純父林居端午名客呼之侑酒不至次日始來問
其故曰昨偶席上賦詩未就耳純父曰爾能詩試即景以五月六日為
題綺生朗吟云酒剩蒲觴冷門懸艾虎新坐客咸擊節由是詩名大起
縉紳若高玄期李君實皆與酬和綺生嘗有句云掃眉才子多相忌未

敢人前說較書蓋自傷也虞山詩集謂為松陵一元氏負之而趨悒鬱而死所云一元氏者除名會元沈同和志學也子於乙酉冬猶及見之酒間談論援今證古娓娓不休亦未至以五七言讀詞回環迄不能句第於帖括則全不解耳

詠懷

幾點愁人淚不許秋風吹吹到長江裏江流無盡期

呼文如一首

文如小字祖江夏營妓與丘謙之綢繆和荅有

遙集編

詠庭中安石榴呈丘生

安石孤根託謝庭合歡枝上日青青懸知雨露深如許
結子明朝似小星

王微六首

微字修微揚州妓皈心禪悅自號草衣道人初

歸歸安茅元儀晚歸華亭許譽卿皆不終有期

山草樾館詩集

重過雨花臺望江有感

春姿靜東岑雲影結遙粲坐覺高臺空不知翠微半落
花自古今啼鳥變昏旦撫化良易遷即事聊成玩况乃
晴江開淥波正拍岸

有人以斷腸草寄怨予偶見戲反之

木名有連理草名有宜男花有枝並頭禽有翼鸚鵡西
方鳥共命東海魚比目輕鸞千二百鴛鴦三十六相思
為唐殿合歡是漢宮雀屏開甲乙龍劔匣雌雄之子賦

斷腸稱物作苦語聊拈佳耦名其他未遑舉

夾山漾別陳仲醇

夾山寒水落木葉下紛紛斜日已難別扁舟况送君
瑤華一以折零露不堪聞為我題紈扇新詩寄白雲

仙家竹枝詞

幽蹤誰識女郎身銀浦前頭好問津朝罷玉宸無一事
壇邊願作埽花人

憶江南

寒沙日午霧猶含蕭瑟風光三月三撲地柳花新燕子
不由人不憶江南

湖上早起

中流何處聽雞鳴只看船牕烟霧生剛到五更翻睡去
急披衣起已天明

蔡彬一首

彬字清卿江都妓

贈別

傷情不奈出宜春遙見離亭倍愴神昨夜樓頭好明月
今宵分照遠行人

郝婉然一首

婉然字蕊珠京師珠市妓有調鸚集

鳳皇臺

雨過荒臺春草長浮雲暗處是斜陽杏花零落知多少

黃蝶翻飛野菜香

李貞儷 一首

貞儷字澹如桃葉妓有韻芳集

月夜有懷

不見風前舊令君滿庭霜月白於雲仙居只隔清谿曲
此夜鐘聲應共聞

茹瓊 一首

瓊錢塘妓許歸金華唐生生負約嘔血卒

元夕

湖南湖北雪初消画鼓春幡總寂寥不是鄰家燈火近
那知今夕又元宵

楊宛 四首

宛字宛叔金陵妓有鍾山獻正續集 宛叔能詩有麗句善

草書歸茗上茅止生重其才以殊禮遇之止生歿國戚田弘遇奉詔進
香補陀謀取宛叔宛叔盡橐裝奔焉田以老婢子畜之俾教其幼女弘
遇死復謀奔東平侯劉澤清將行而京城陷乃為丐婦裝間行還金陵
盜殺之于野宛叔與草衣道人為女兄弟道人屢規切之宛叔不從道
人皎潔如青蓮花亭亭出塵而宛叔墮落汙泥為人姍笑不亦傷乎
茅止生云宛叔歸余年纔十六能讀書工小楷其於詩遊戲涉略若不
經意然無枯澀之色鮮潤流利 鍾廣漢云止生之嬖宛叔
之嬖柳如是同類燕人之惑易安得悉以蘭湯浴之

詩話止生得宛叔深賞其詩序必稱內子既以謹荷戈則自詡有詩人
以為成婦兼有句云家傳傲骨為迂叟帝賚詞人作細君可云愛惜之
至顧宛叔恒思背之秋懷詩云獨自支頤獨自愁深情欲語又還羞從
來薄命應如此敢比鴛鴦到白頭棘心已露矣止生亡後思倚國戚田
弘遇以其賄遷不期弘遇第以衆人畜之尋俾其授琴書於季女甲申
寇變宛叔攜田氏女至金陵匿山村中盜突入其室欲汙田氏女女不
從宛叔從旁力衛之遂同遇害詩如江清風定候山碧雁來
天亦稱佳句其行楷特工能於瘦硬中逞姿媚洵逸品也

種桐

靜居無寄懷種桐廣除內桐高盈丈餘風露相吸逮本
以遲鳳棲鳳棲不可再我聞古良士往往思其外預愁
斷為琴知音復誰在

哭侍兒湘雲

湘水千年在湘雲去不回牀頭鍼線帖此後更誰開

春日有感

翠館紅樓白石橋高花低柳自飄颻画闌幾處無人到
多少春光暗裏銷

次止生七夕見懷韻

遙遙望斷白蘋洲惟見銀河一派流那得閒情還乞巧
夢魂尋遍木蘭舟

顧娟娟

一首

娟娟嘉興妓

詩話娟娟居蘇小小墓東北短小穠粹妙歌舞雙鞵柔弱胡旋燈前觀者靡不歎絕間作小詩以書法不工偶對人口占而已崇禎末年卒

贈別

南國相思子西番篤耨香留君充雜佩休賭紫羅囊

明詩綜卷九十八

明詩綜卷九十九

神鬼 附物怪

小長蘆 朱彝尊 錄

梅會 沈翼 緝評

虞 皋 一首

皋羅源人閩王璘時常鬻黃精于市龍啓間為道士陳守元所辱故人木當敏因背之去尋入仙茅山羅喜洞當敏尾之望見洞中玉堂金闕麗人被珠襦者百數皋至皆却行前迎建翠於孔蓋當敏大駭頓首謝罪皋目笑之有頃宴客堂上盛設食飲昇當敏以僕妾之餐坐之堂下然亦非人世所有滋味居十日當敏辭歸皋及

賓客送之至洞門客吹尺八擊玉磬皋和而歌
云云歌畢忽然俱去當敏歸城郭人民盡非昔
日蓋洪武之十二年矣

歌

朝為雄子暮為雌天地終盡于人生幾時

徐電發云足比彭令昭所歌人間可

哀之曲

貞元道人一首

徐州鄧玉田扶叶仙于都下題詩畢自稱貞元

道人

詩

勾漏山頭古洞天金堂玉室地相連門前千尺長松樹

親手栽來不記年

無上宮道人

仙游歌

靜志居詩話萬曆庚寅秋古鄧吳道人以符籙游江淮間尋抵嘉禾仙
降于周處士履靖逸之宅有曰無上宮道人有曰崖老縛筆于叶揮灑
若風雨之驟由是彭輅子殷文嘉休承皇甫汙子循張之象月鹿侯一
元舜舉李奎伯文仇俊卿謙之馮皋謨明卿莫雲卿是龍李日華君實
異而交和之處士哀為一卷
子殷序之君實跋其尾焉

君不見蓬萊縹緲三山幽天風萬里羣仙游光分日月
五城界春滿烟霞十二樓洞門桃花歲復歲巖前桂樹
秋復秋羣仙游于上玉京翩翩自適春風情鞭龍或耕
瑶草去騎鹿愛遶青松行感藻日之端征歎浮生之易
邁信人間之可哀留幔亭而高會有時采藥來天台迷

花宿霧臨瑤臺五三六點靈雨滴百千萬樹梨花開主人置酒初醞醅我今暢飲休相推風光如此不盡醉虛負青華赤玉杯

崖老

詩

乍下人間世何須問姓名翩翩臨水影窅窅步虛聲恣草黃庭帖還調碧玉笙江南美風物九月采蕪莖

降道人

探梅

詩話崇禎辛巳道人題畢人莫會意王翊曰道人起句謂舟輕則速十里之行等五里雪霽而殘一山所積止半山爾叶書王子可與言詩

輕舟十里五里殘雪一山半山我意探梅獨往誰教放

鶴先還

轉華菴叶仙一首

福州西關外轉華菴壁挂叶仙詩字體飛動不類人間書見閩小記

綠雲出洞又入洞黃鶴下山復上山道人此日歸何處雲自無心鶴自還

候官叶仙一首

嘉靖中倭亂起候官張經總督浙直軍務經行止未能決質之召叶者叶動大書曰我關雲長也題詩云云經殊惡之後遭讒棄市

詩

萬里縱橫事已空戰袍裂盡血猶紅夜來空有思鄉夢
雨暗關河路不通

百泉書院降神詩 一首

天啓二年五月杞縣趙彥復集客于百泉山書
院有神降叩題詩彥復曰神得非淮陰侯邪曰
然

詩

相逢奚必定知名九里山前殺氣橫不及清淮一竿竹
風波靜處過平生

清真觀童子 二首

崑山柴奇讀書於清三六觀夜二鼓月色如晝忽

見五童子披鶴氅麾羽扇從空而下為迴波之
舞歌曰云云見周玄暉涇林續記

歌二首

駕而風兮策而霆乘白鶴兮入蒼冥山青青兮海澌澌
壁為月兮珠為星駕赤虬兮上玄冥水瀟瀟兮嶽亭亭

晚翠亭鬼 一首

載葉世奇草木子

詩

一徑入青松飛流澹晴綠道人晚歸來長歌振林谷山
深不知秋落葉下枯木須臾翠烟開月色照綵服

鄭婉娥 一首

吳江沈韶洪武初汎舟游襄漢次九江登琵琶
亭月下彷彿聞歌聲明日復往徙倚亭中有麗
人來呼韶並茵坐曰妾僞漢主婕妤鄭婉娥也
年二十而死殯于亭側因口占一律贈韶且命
侍兒鈿蟬取酒韶與留連半載談元末羣雄興
廢及僞漢宮中事歷歷可記臨別以金跳脫爲
贈

贈沈生

鳳艦龍舟事已空銀屏金屋夢魂中黃蘆晚日虛殘壘
碧草寒烟鎖故宮隧道魚燈膏欲燼妝臺鸞鏡匣長封
憑君莫話興亡事淚濕胭脂損舊容

吳師禹

二首

成化中候官吳師禹於吳嶼結屋月夜載酒遍
飲漁翁至嘉靖間已物故士人張君壽八月幾
望舟泊吳嶼忽上流一翁盪槳而歌云云君壽
刺舟與語翁曰我吳師禹也君壽不知其已死
偕訪其家酒行復賦詩云云夜旣闌遂寢旦覺
乃在叢莽中詩箋尚在觸手成灰

詩

蓼香月白醒時稀潮去潮來自不知除却醉眠無一事
東西南北任風吹

又詩

世路無媒君莫悲
開闌看取牡丹枝
姚黃魏紫俱零落
能得春風有幾時

董槐一首

萬曆中閩人董槐能文彊記年十七而沒殯於里之龍山長見形為母護湯藥墓上樹蟲齧成字或螳緣土為字皆成詩句未必書行仙董郎

詩

原南原北綠如烟
萬疇千聲鳥可憐
擷得榆錢盈兩袖
春風寒食自年年

詠松僧一首

詩

庭前兩株松風吹一株折朝減半庭陰
夜露半庭月

有僧作前二句詩未成而死淒風寒月常有鬼吟此後有人聞而續之鬼遂滅

楊玉香一首

成化中閩人林景清以鄉貢北上不第歸過金陵戀伎楊玉香既別而玉香天泊舟白沙玉香魂夜至有詩和酬再過金陵訪之則死已一月矣撫棺而慟是夜獨宿見玉香從帳中出吟詩云云

答林生

天上人間路莫通
花鈿無主畫樓空
從前為雨為雲處
總是襄王一夢中

小水人 六首

安成彭氏築菴山中命僕守之暮有女子自稱
小水人徑入臥室僕固拒之女云只見船泊岸
不見岸泊船何無情乃爾尋登僕榻僕懼取佛
經執之女笑云經從佛出佛豈在經邪天將旦
僕起擊菴鐘女取髻上牙梳掠鬢忽走入松林
不見壁上題詩云

妾住小水邊君住青山下青年不可再白日坐成夜
只見船泊岸不見岸泊船豈能深谷裏風雨誤芳年
薄情君拋棄咫尺萬里遠一夜月空明芭蕉心不展
解下羅裙帶無情對有情不知妾意重只道妾身輕

經從佛口出佛不在經裏郎在妾心頭郎身隔千里
月色照羅衣永夜不得寐莫打五更鐘打得人心碎

王秋英 一首

嘉靖中福清諸生韓夢雲過石湖山見遺骸哀
而掩之是夜宿藍田書舍一麗人斂衽拜燈下
曰妾王秋英字澹容楚人也父德育元至正間
以兵曹郎參軍入閩妾從父之官遇寇投厓死
荷君子厚德惠及骼齒是亦夙世緣也遂定情
焉生一子曰鶴算萬曆癸巳揮淚而別事載萬
鳥啼春集

歸楚留別夢雲

兩年歡會夢魂中聚散人間似轉蓬歲月無情催去燕
關河有信寄來鴻劔沉延浦光終合瑟鼓湘靈調自工
他日扁舟尋舊約夕陽疎影楚雲東

冬橘 一首

女鬼冬橘張校官致祥遇之

秋夜吟

幽蛩響寒砌白露墮寒石獨立看月明不覺羅衣濕

莆田女鬼 一首

萬曆初莆田有王太守良臣者築園亭郊外且
傾圮矣崇禎中邑諸生梁鼎鐘假為學舍有女
夜至自稱太守女鼎鐘與定情三年一夕別去

作詩以贈生

別梁生

側側復力力與君長歎息出入自苦愁單情還相憶

西寧侯邸花神 二首

閩人鄭琰翰卿客西寧侯邸晝夢黃衣少年要
至廡下共飲少焉一麗人至少年自起舞歌春
游之曲云云次及麗人作迎風之舞歌春愁之
曲飲正歡少年駭曰文羌校尉來矣見一人綠
袍張目至前遂罷席而寤起視庭中牡丹一花
映日婉媚一黃蝶猶未去則少年也一螳螂長
二寸集葉上是為文羌校尉麗人則牡丹花神

云是年西寧侯薨

春游曲

芳草多情王孫未歸遲我良朋東風吹衣

春愁曲

金衣公子話春愁幾度留春更不留昨日漫天吹柳絮
玉人從此懶登樓

妖鼠詩 一首

成化二年長樂陳豐獨坐山齋梁上二鼠相鬪
忽墜化為二老翁長可五六寸對坐劇飲聲如
小兒既而二女子歌舞勸酬歌詞云云酒既闌
乃合為一大鼠向豐作拱揖狀而去載晉安逸

志

歌

天地小如喉紅輪自吞吐多少世間人都被紅輪誤

張秋鴉語

崇禎戊寅張秋鴉作人語云云未幾李青山作
亂殺人盈野歲饑民剥樹皮食之棗一升值錢
五百克東西四百餘里寂無人載張怡謏聞續

筆

人少人少無米怎了

明詩綜卷九十九

明詩綜卷一百

雜謠歌辭

小長蘆 朱彝尊 錄

查山 張士俊 緝評

靜志居詩話昔漢孝武立樂府采歌謠班孟堅謂代趙之謳秦楚之風皆感於哀樂緣事而發可以觀風俗知薄厚故郭茂倩編樂府詩集雜謠歌辭包括無遺余特仿其例摭采附於卷末惟夫童謠輿誦及田家雜占未嘗師法古人出於天地自然之音世治之汙隆人材之邪正莫不一本好惡之公所謂詩可以觀者是已繹逐燕之旨知革除本自皇衷諷雨帝之言信奪門元非人事苟察於耳介葛盧之於牛斤師翁偉之於馬公治長之於烏猶將欣然遇之載諸篇籍矧無戾於春女之思秋士之悲者乎年來史局雖開汗青無日留此以俟撰五行志循吏傳者采擇焉

劉侯歌

永樂中山陽劉安知南宮縣勤於撫字境內旱蝗率吏民步禱蝗亦頓絕是歲鄰邑皆饑惟南

宮大稔民歌曰

侯宰南宮民和政通蝗不入境今之魯恭

何鐵面

永樂中仁和何灝官刑曹郎持法不避貴勢京師語曰

毋縱誕避何鐵面

京師語

穎上李芳中永樂中進士任刑科給事中執法不撓忤權倖謫海鹽丞棄官居家宣宗嘗顧問曰李芳何在近倖畏其剛直多沮之京師爲之語曰

永樂紀綱宣德李芳

京師語

正統戊辰京師語云云是年安福彭時殿試賜第一甲第一名

莫問知不知狀元是彭時

京師童謠

正統中京師羣兒連臂呼于塗曰正月裏狼來齧豬未一兒應曰未也循是至八月則應曰來矣來矣皆散走時方旱又有羣兒歌於塗云云既而有狼山之難

雨帝雨帝城隍土地雨若再來還我土地

京闈語

景泰癸酉廬陵羅崇嶽舉順天鄉試第一以詭籍斥還後三年大學士陳循子瑛王文子倫入試皆不得舉有旨特賜舉人時人語曰榜有姓名還是學生榜無名氏京闈貢士

翰林語

茶陵李東陽等為翰林長而王九思等為簡討

時人語云

上有三老下有三討

京都語

成化中光州熊种官兵部侍郎時馬為尚書

而侍郎有左熊右熊京師語云

兩熊一馬太平天下

京師語

弘治中鍾祥沈文華為刑部員外郎事多平反

京師語云

有事勿忙須問沈郎

京師語

麥公牢子崔公馬高公銀子當磚瓦

都下諺

吏科官戶科飯刑科紙工科炭兵科阜隸禮科看

安州語

蘇州張寅仲明中正德辛巳進士知安州浚牙
家港築隄暇則與士子講學時孔天睂知邠州
亦以才見重時人語曰

有所疑問安邠莫憂竦有張孔

京師語

嘉靖五年天台起復知縣潘淵進嘉靖龍飛頌
效蘇蕙織錦圖帝以其文縱橫莫辨使開寫正
文以進是時請建世室者有監生王淵進世廟
頌擢上林監丞京師語曰

兩淵口闊如斗笑殺張蘿峰引出一羣狗

疫無鬼

容城楊繼盛少時讀書僧寺時僧多病疫同舍
生成亡去繼盛為調藥餌僧以次愈時人異之
語云

疫無鬼以為不信視楊子

都中歌

嘉靖中土木繁興一時工曹驟增數員都中歌
曰

馬頭雙馬後方督工郎

束鹿語

濮州蘇祐補束鹿知縣邑多囚繫下車一日釋
數百人明日革罷徭車三十兩又明日有詔召

東鹿令邑人語曰

三日官府百年父母

翰林語

京山李維楨在翰林博聞強記與新安許國齊

稱同館語云

記不得問老許作不得問小李

得山禽

萬曆中合肥黃道月好挾少年岸幘衣半臂紫

袷坐驄馬挾彈游西山時人從之語云

得山禽從舍人

燕人諺

過了八達嶺征衣添一領

北地諺

駱駝見柳渴羌見酒

富林語

華亭曹時中與兄泰隱富林以詞翰自老時人

語云

富林二曹一時人豪

道士歌

建文中京師有道士歌于塗云云

莫逐燕逐燕起高飛高飛上帝畿

况太守歌

宣德中况鍾知蘇州府稱治最秩滿去民叩闕
留者八萬人吳人歌曰
况太守民父母早歸來樂田叟

興化謠

浦政四川舉人正統六年任揚州興化主簿寬
恕廉靖民謠云

浦政打蒲鞭青布緣了邊九年三考滿不要一文錢

江陰歌

天順中昌黎周斌以御史論劾曹石謫知江陰
縣士民愛戴之歌曰

早為災我公禱甘雨來水為患我公禱陰雲散

淮上歌

瀋陽范鏊中正德丁丑進士歷官兩淮運使盡
革夙弊遷四川參政以去商民立祠淮水上為
之歌曰

范來早商民飽范來遲商民饑

興化民歌

嘉興孫璽知揚州興化縣事有土豪徐恩入貲
為千戶交結權貴橫行鄉曲璽以法殺之民歌
曰

彼惡人子虎翼而飛惡人既殺子公瘠我肥

嘉靖中童謠 二首

賣槍纓人上城

茄頭下人走馬

留都語

扶溝劉自強嘉靖中官應天府尹尋轉都察院
右都御史進戶部尚書再改兵部居官峻法一
尚書囑以事怒曰賊吏敢爾邪起奮筆仆其隸
人留都為之語曰

尚書賊輿臺僵矯矯劉公洵自強

吳下語

吳人皇甫冲兄弟四人竝有盛名既而張鳳翼
兄弟三人亦有名於時吳下語云

前有四皇後有三張

吳人語

長洲文震孟性孝友居翰苑未踰年罷官家居
吳人語曰

求忠臣須孝子翳為誰文文起

興化歌

廬陵陸某知揚州興化縣事將入覲報政民歌
之曰

昔來何遲今去何速惠我弗終昭陽之陸

涇縣歌

嘉興高承埏知涇縣將去民歌之曰

眇公車來何暮計公程去何馬公內名我何之急攀轅
告上司上司揚言不可止入都門見天子

如皋謠

長山王岫生中崇禎庚辰進士知揚州如皋縣
事性愛畜蝶民有罪當笞者輸蝶得免羅致千
百名客飲縱之以為樂邑人語曰

隋堤螢火輟縣官放蝴蝶

江南謬

江南田家占雨謬曰

甲申尤自可乙酉怕殺我

按二語宋時即有
而江南至今傳之却成七國之讖

南京謬

福藩稱制江南馬士英阮大鍼等用事一時倖
進者眾南京為之語曰

職方賤如狗都督滿街走

南京童謠

一匹馬走天下騎馬誰大耳兒

詩話指士英阮大鍼也時又有對聯云闖賊無
門匹馬橫行天下元凶有耳一兀坐擾中原

南京童謠

楊柳青放風箏

吳謬

二首

官糶辦便無飯

南道如虎升官半府

吳中諺 六首

有利無利但看二月十二 花朝日晴則百果多實

三月溝底白沙草變成麥 三月無雨麥乃有收

六月不熟五穀不結

秋孛鹿損萬斛 立秋日不宜雷

若要麥見三白 冬至逢第三戌為臘臘前雪三次謂曰三白大宜菜麥

除夜犬不吠新年無疫厲 除夜宜靜

常州語

江陰莫動手無錫莫開口 江陰人拳勇無錫人善歌

惠山謠

惠山街一名綺塍街夾路古藤喬木謠云

惠山街五里長踏花歸鞦韆底香

解州歌

永樂中浮梁吳惠知解州民歌曰

吳父母恩何溥昔憔悴今鼓舞

山西謠

正德中歷城徐暹為山西副使時有巨寇號混天王劫掠郡縣暹以計平之民乃語曰

不發一矢賊乃盡死不荷厥戈賊死實多

吳公謠 二首

吳江吳山為山東副使獄無滯囚時有塞井復漂民為謠云云既而遷福建按察使聽訟明允

民又謠云云

彼泥者泉弗浚而復錫我則福
鳳之棲其雛來儀民具是依

諸城縣漢王山西南五里有卷簾莊雖嚴冬無霜
降邑人諺云

卷簾莊秋冬不下霜

德州諺

德州苦水舖土人素狡諺云

苦水舖神仙過留筒布

山東謠

霑化李魯生日照李蕃天啓中交結奄宦以鬻

爵為事青兗間謠云云後魏璫敗魯生蕃俱以

太僕少卿擬徒

若要起問二李

通許諺

通許婁良與同郡賈恪齊名兩人皆中正統進
士邑人諺曰

婁良賈恪氣如山嶽

太康謠

博興韓珣令太康多異政蝗不入境民謠曰
欲蝗不復墮須是韓公過欲蝗不為災須是韓公來

禹州歌

上海潘恩知禹州州人語曰

莫相仇避潘侯

郭公讖

嘉靖元年河南巡撫何天衢命百戶元修月堤發一古冢塼上朱書云云塼空其中人以為琴

几

詩話崇禎中帝製於變時雍琴曲曾取此塼入禁

郭公塼郭公墓郭公逢著元百戶巡撫差爾修月隄臨時讓我三五步

慶陽軍中語

洪武初張良臣復據晉陽以叛其兵精悍養子

七人咸善戰軍中語曰

不畏金牌張但畏七條鎗

臨洮歌

潞城劉昭宣德中為臨洮尹多仁政民歌曰

野有流民惟侯集之邑有田疇惟侯闢之古人謹獄惟侯哀之有此三惠孰不懷之

塘下童謠

台州太平縣塘下戴某與方谷真婚戴氏將敗童謠云云及洪武末戴氏竟籍沒惟二女出嫁存焉

塘下戴好種菜菜開花好種茶茶結子好種柿柿蒂烏

摘了大姑摘小姑

羅太守歌

桂陽羅以禮永樂中守紹興寬猛得宜遇雨暘
不時往禱輒應民歌曰

太守羅以禮祈晴得晴祈雨得雨

二洪歌

莆田洪楷從子珠後先知紹興府崇尚名教人

歌之曰

大洪小洪先後同風

湯太守歌

安岳湯紹恩為紹興守瀕海潮至滄沒田舍紹

恩為築隄建閘以時蓄洩闢田數千畝越人歌
之曰

泰山巔高於天長江水清見底功名如山水萬古留青
史

越人語

長清李僑嘉靖中知紹興府多惠政時知山陰
縣事李某不得於民每出則以兩鐵索前導而
僑必懸兩爐焚香越人語曰

府香爐縣鐵索一為善一為惡

平湖諺

平湖俞獻字廷貴有行誼熊卓知縣事引與計

事行之民輒曰神明或干以私遂謝弗與通里
人諺曰

郭東俞生當春握冰

嘉興語

金溪洪範知嘉興縣事承知府楊繼宗之後廉
靜寡欲士民語云

洪令楊守承前啓後

童謠

狸狸斑斑跳過南山南山北斗獵迴界口界口北面二
十弓箭

詩話此子童穉日偕間巷小兒聯臂
蹋足而歌者不詳何義亦未有驗

饒州歌 二首

陶安知饒州當入覲民爲之歌云云既而復命
守州事載歌云云

千里榛蕪侯來之初萬姓耕闢侯去之日
湖水漰漰侯澤之流湖水有塞我思侯德

賈推官謠

嶧縣賈訪弘治中爲建昌推官大璫至廷辱郡
守以下官訪獨與抗禮民謠云

知府一堆泥同知一凶土若非賈推官壞了建昌府

南豐歌

通州馮堅洪武中爲南豐典史 一作南豐知縣海陽戴瑀政平訟

理民懷其德歌曰

山市晴山鳥鳴商旅行農夫耕老瓦盆中冽酒盈呼躑躅突不聞聲

南豐歌

建德陳勉景泰中為南豐知縣百廢具舉民歌之云

大尹陳政事新男耕女織歌陽春

江西謠

弘治中吳江王哲巡按江西有威名民為謠曰江西有一哲六月飛霜雪天下有十哲太平無休歇

安仁語

南海洗光正德中知安仁縣能辨疑獄百姓語

曰

民無冤訟有洗燈籠訟無滯屈有洗三日

九江語

萬衣為南京刑部主事頻夢其父心動請急歸抵家九日父沒里人為之語曰

萬孝子生知死

建昌民謠

晉江吳夢相為建昌府推官遷南京大理評事時人語曰

吳公吳公行李皆空公道服人私情不通

浮梁謠

浮梁人吳十九善製磁器士大夫多與之游時
人語云

成窯太薄永窯厚天下馳名吳十九

萬安上灘謠

一灘高一丈南安在天上

萬載謠

萬載翟昌甫家貧樂道好讀書春夏移書於佛

塔秋冬樓居里人諺云云後以人才舉為郎

春夏塔秋冬樓風吹四面搖昌甫獨不憂

童謠

蒲圻陳文禮字貴和洪武三年由貢生授監察
御史有冤獄久不決童謠云云文禮悟曰罪人
必康七也果如其言

斗穀三升米說與陳文禮

王捕虎歌

清苑王哲為湖廣布政使廉正彥明人不敢干
以私歌之曰

王捕虎最執古囊無錢衣有補

漢陽民歌

廣州何澹字中美以天順中進士知漢陽府民
歌之曰

何太守築漢陂飢得食寒得衣

陸青天謠

嘉善陸邛知武昌府郡人謠曰

陸青天口明月青天無不青明月有時缺

辰州苗民語

不畏官軍但畏糶屯

沈融谷云苗民負固恃有千萬山峒軍退則突出軍至則潛藏惟官軍糧多築長圍困之其所畏也

辰州田家諺

二首

四月八日晴魚兒上高坪

十日雨連連高山也是田

詩話廣信府志亦載此語

蜀人語

安陽崔陞任四川參政與僉事曲銳竝有威名

蜀人語曰

崔參曲僉屹如雪山

崇慶諺

崇慶俗尚浮屠萬輔居喪獨遵家禮鄉人化之

諺曰

萬輔一呼喪禮皆儒

蜀中謠

蜀寇黃中據支羅砦與牛欄坪相望里許萬山斗絕目為天城謠云

打得支羅砦金珠滿船載打得牛欄坪換箇成都城

播州語

楊友與楊愛兄弟相仇兩州為之不寧土人語云

骨肉驚醢參商播凱

萬曆二十七年播酋叛勢甚張十月鄉人譚經歷怒避兵深巖忽聞石裂有文在石上云云巡撫郭子章鏤板以傳賊中明年賊果滅

聚山巖人化血石壁壞諸蠻絕

蜀諺

豔瀕冒頂黑石下井

惠安語

洪武中三河安景賢知惠安縣事民頌之曰
安公莅止視民如子

興化謠

正德中進士岳池馮馴守興化民謠曰

馮太守來何遲胥吏瘠百姓肥

閩中語

布衣高澂傳汝舟從鄭善夫游學為詩閩人為之語曰

高垂股傅脫粟言斷斷中歌曲

葉君歌

隆慶中歸善葉春及知惠安縣民愛之如慈父

歌之曰

葉君為政惟飲吾水設施不煩五風十雨

福建語

會稽商為正萬曆初巡按福建與巡撫都御史
龐尚鵬協心共事百廢具興福建語云

恤我甘苦龐父商母

閩中謠

嘉興譚昌言為福建提學人有投私書者槩不
發試竣題數行裏原書復之閩人語云
來一封去兩封以為不信視郵筒

吳公歌

崇禎中新安吳彥芳為莆田令有惠政秩滿去

新縣令催科嚴民乃思吳公歌曰

陽春何去霰雪何來父邪母邪翳惟我懷

武夷諺

一曲一灣一灣一灘

泉州語

洛陽橋一望四里皆琨瑤

莆田諺

橘子黃醫師藏

順德謠 二首

嘉靖初餘姚金蕃知順德縣初政尚嚴民謠云

云比及暮豪強斂獄訟減民復謠云云

朝鯁鯁毛厥施乎夕棫棫石厥畫乎勞乎勞乎盍燕以
教乎

華蓋之屹屹不如尹之無泐碧鑑之粼粼不如尹之無
津長我禾黍穀我士女吁嗟乎膏雨

順德謠

德清胡友信宰順德邑多盜懼民輕法頗尚猛
厲凡獲賊腊其鼻或投諸淵聞者震驚謠曰
山有虎邑有胡無捋其鬚

惠州歌

福州鄭天佐為惠州通判善折獄民歌之曰

縣遲延府一年但愬鄭青天訟無滯民不冤

高州歌

開縣嚴琥同知高州府時大饑琥捐俸以賑民

歌曰

治我嚴父生我慈母

雷州歌

永樂中天台黃敬知雷州府先是郡多囚繫敬
至數日悉為剖決獄盡空民歌之曰

黃公來遲使我無依今公莅政惠我無私

瓊州民謠

瓊州蠻黎岐習馳射自稱神弓高曆十四年為

官兵所敗請降民謠云

弛神弓來歸降

儋州諺

儋俗事神有上帝會天妃會鄧天君會羊元帥
會鑾輿五采迎神十百大饗于村中景泰天順

間諺云

柳英有銀兒子跳神洪全有金阿母賣鍼

廣東諺

飢食荔支飽食黃皮

黃皮果狀如金彈六月熱其漿酸而
除暑熱與荔支並進荔支饜飮以黃皮解之

蛇珠千枚不及玫瑰

潤蚌之胎有玫瑰文魮之腹有美玉

文魮鳴美玉生

高州海中有
文魮鳴似磬而生玉

多食馬蘭少食芥藍

馬蘭食之
養血芥藍不宜多食

廣州諺 七首

爾有垣牆我有火秧

火秧叢生成樹四稜
有芒刺廣人以作籬落

嬰兒瘦探石覈

石燕產西樵巖穴中
足生翼末小兒羸瘦取食之

家有竹雞啼白蟻化作泥

竹雞形如鷓鴣褐色
斑赤文啼曰泥滑滑白蟻畏之

秋冬食麀春夏食羊

朝為泡魚暮為蒿豬

泡魚大如斗身有棘刺
化為蒿豬齒長入海復化為魚

霜蟹雪螺味不在多

石灣瓦勝天下

粵諺

韶州水急至險者為牯牛灘舟子語云
行過牯牛五石灘寄書歸去報平安
過得牯牛舟子白頭

大廟峽歌

清溪濛裏二驛名 路多虎早眠晏起

肇慶府謠二首

西水自廣西來每歲夏至後淫雨暴漲諺云

水浸釣魚臺上下不得來釣魚臺峽 中山名

西水漫漫魚蟹滿盤

瓊州諺二首

瓊州以海水占年海水熱則荒諺曰

海水熱穀不結海水涼禾登場

海南多陽一木五香

瓊州諺

瓊州東界地瘠以羊骨壅田終無穫腴壤多在

西故諺云

東路檳榔西路米糶

徭人謠

羅旁徭九星巖有石其底空洞撞之淵淵作鼓
聲每出劫人擊之以為號其謠云

撞石鼓萬家為我虜

粵西諺

思播田揚兩廣岑黃

言宣慰氏族之大也

花瓦謠

田州女土官瓦氏嘉靖十四年調之征倭至蘇州索有司捕蛇為軍中食敗倭於王江涇時人語云

花瓦家能殺倭腊而啖之有如蛇

華林謠

江西華林洞賊反檄田州土官岑猛征之猛兵沿塗剽掠民皆徙邨避之謠云

華林賊來亦得土兵來死不測

藤峽謠

自藤峽徑府江三百餘里諸蠻互為死黨出劫商船得人則剗其腹投之江中峽人謠云

盜有一斗米莫泝藤峽水囊有一百錢莫上府江船

永通峽謠

藤峽平後正德間遺孽漸蔓峽南尤甚橫江禦人莫可禁制都御史陳金以諸蠻所嗜魚鹽乃令商船度峽者以此委之道稍通金疏其事請名永通峽詔從之未幾諸蠻征索無厭稍不愜意輒掠殺之潯人謠云

昔永通今求通求不得葬江中誰其作始噫陳公

妖巫歌

金陵初建滇南段寶遣其叔真自會川奉表歸
款朝廷亦以書報之時有妖巫女歌云

莫道君為山海主山海笑諧諧園中花謝千萬朵別有
明主來

永寧語

雲南永寧蠻塞矢不刺非於宣德四年糾合四
川鹽井衛土官馬刺非殺永寧土知府各吉八
合已命卜撒襲職矢不刺非復殺之永寧人語
云

土官數奇逢兩刺非

曲靖歌

成化中灌縣焦韶知曲靖府境產瑞禾民歌曰
禾本二穗嘉穀滿田太守焦公仁德及天

楚雄歌

先大父君顓府君諱大競吳江潘
未填諱知楚雄府政尚
廉靜甫半載丁內艱幾不能治裝歸郡人歌曰
清貧太守一世難百鳥有鳳鳳有鸞

滇中諺

山蠻不落葉地蠻湯自熱

貴州謠

鄰水楊純以監察御史按貴州任滿百姓乞留
一年詔許之民乃謠曰

鄰水楊但願年年巡貴陽

貴州宣慰司居水西曰烏蠻為烏羅羅居慕役曰
白蠻曰白羅羅諺云云言至死猶鬪也

水西羅鬼斷頭掉尾

貴州諺

黃平鐵興隆雪

苗人謠

苗家讎九世休

黔中諺 三首

天無三日晴地無三尺平

四月八凍殺鴨

九月重陽移火進房

陳父歌

印江陳表知廣元縣事與利州衛雜處軍強民
弱表申明制度以服武弁民歌曰

古來力役軍三民七陳父定之彼此畫一家用平康勞
者獲息

翰林諺

翰林九年就熟去寒

蘭江諺

金家梁舊酒香

